

進賢縣志卷十六

循吏

昔班固傳循吏言守而不言令令之以循良著者始於東漢卓茂之令密魯恭之令中牟至於教授蘇湖而謳思百世爲吏桐鄉而俎豆一方有功德於民者固不以職分殊也進賢之爲縣六七百年矣棠蔭遺愛屈指焉不乏其人若漢之梅子真宋之周元公雖授職南昌而善政仁風進賢親被之也故仍著於篇首撰循吏一卷

漢南昌尉

梅福字子真九江壽春人少學長安明尚書穀梁春秋爲郡文



學補南昌尉後去官歸壽春數因縣道上言變事求假軺傳詣行在所條對急政輒報罷是時成帝委任大將軍王鳳鳳專執擅朝災異數見福復上書諫成帝久無繼嗣福又以爲宜建三統封孔子之世以爲殷後先是匡衡議以爲王者存二王後所以尊其先王而通三統也其犯誅絕之罪者絕而更封他親爲始封君以上承其王者之始祖今宋國已不守其統而失國矣則宜更立殷後爲始封君而上承湯統非當繼宋之絕侯也孔子曰某殷人也宜以孔子世爲湯後上以其語不經遂見寢至是梅福復言之綏和元年乃立二王後下詔封孔子世爲殷紹嘉公福歸家以讀書養性爲事元始中王莽專政福一朝棄妻子居九江至今傳以爲仙其後人有見福於會稽者變名姓爲吳市門卒云今進賢雲橋俗傳是其經行起雲處也金山有梅村君山有梅潭其旁邑餘干有梅溪禮梅嶺豈亦召伯所芟耶

以下俱本舊志

知縣

宋

周敦頤字茂叔道州營道人原名敦實避宋英宗舊諱改焉以舅鄭向任爲分寧主簿縣有獄久不決公一訊立辨部使者薦調南安軍司理叅軍有囚法不當死轉運使王逵欲深文重比之公獨與之辯逵不聽乃委手版將棄官去曰殺人媚人吾不

爲也達悟囚得免移柳之桂陽令已徙南昌南昌人皆曰是能
辨分寧獄者吾屬得所矣一時富家大姓黠吏惡少皆以污穢
善政爲恥歷合州判官部使者趙抃惑於譖臨之甚威公處之
超然通判虔州抃守虔熟視其所爲大悟執公手曰吾幾失君
今而後乃知周茂叔也熙寧初知郴州用抃及呂公著薦爲廣
東轉運判官提點刑獄洗冤澤物行部不憚勞苦以疾求知南
康軍因家廬山蓮花峯下前有溪合於湓江取營道所居濂溪
以名之抃再鎮蜀將奏用之未及上而頤卒年五十七頤博學
力行著太極圖明天理之根源究萬物之終始又著通書發明
太極之蘊掾南安時程珦通判軍事視其氣宇非常與語知其
有道因使二子顥頤受業焉嘉定十三年賜諡曰元公

張嘉謀廬陵人登隆興間進士授奎章閣學士兼修國史階左
文林郎乾道四年以建言謫知進賢爲政廉明仁恕民甚德之
邑治廨宇陂澤多所剏鑿秩滿民不忍釋乃留其子有慶贅於
何家山之何氏今何姓者其遺裔能紹絃誦爲邑世族云
江介乾道間知進賢歲饑詔蠲半租介白部使者程大昌曰但
減其半則里胥仍舉盈數民未堪也若自全戶三升以上悉蠲
之則貧民咸被實惠矣嘗嘆曰民饑而食之猶子饑而乳之敢
幸賞乎其實心拊循如此

程迥字可久江寧人隆興元年進士知進賢值民饑府檄有愬

閔糶及糶與商賈者迴曰力田之人節腹治米每斗錢九十五文逼於賦稅出糶非上戶也縣境不出貨苟不以粟易錢何由得輸官耶今強者羣聚脇持取錢毆傷人者甚衆愚民不敢入市坐致缺食言通販者非是申言再三見從乃已縣大水無稻麥郡符下蠲租至薄迴白曰是驅民徙也賦不可得徒存欠籍耳盍悉蠲之郡僚執不可迴正色曰唐法損七則租庸調俱免今損十矣夏稅役不免猶用其二也公尚謂寬乎議乃定境內有婦人傭紡春以養姑其子爲人牧易乾餼以餉祖母者迴廉得之白於郡給以錢粟居官莊而寬明而信百姓戴之迴博究經史有春秋周易語孟記傳評論醫卜田賦度量權等方法例

圖二十餘書卒官奉朝郎朱子嘗稱之曰博聞至行追配古人釋經訂史開悟後學如程先生者非獨章句之儒

繆瑜字珍叟號崆峒龍南人登淳熙丁未進士嘉定七年任多善政民感之有崆峒集

元

完顏璧河陽人大德間爲尹廉明公恕愷悌愛人嘗以輸賦稽緩受府管璧恐民聞而懼也反召而慰安之民益感戴爭先輸納惟恐爲賢令累賦畢登

陳世榮字顯卿山東莘縣人天歷戊辰來令進賢時詔有司造軍器世榮驗租數以爲多寡刻程限事集而民無擾明年大饑

進賢縣志 卷之六
捐廩祿以散粥隨聞於上賑糧乃下故雖饑而民不傷在縣政
平訟理治田桑興學校均賦役刑名錢穀零襍靡不究心嘗曰
民可殘也天可誣乎以老辭任授奉訓大夫致仕邑人不聽其
去爭具木石築室於南門外居之

傅箕字拱辰號良菴邑六都人從包希魯學舉至正進士任延
平路錄事以介特稱轉本縣令當黔黎凋瘵干戈搶攘之際箕
厲行潔清民受其庇其後陳友諒以書幣聘之不受入明不赴
徵而屢典本省及應天文衡仍以元江西行中書省簡較卒於
家

辛敬字好禮大梁人尉進賢七年直惠安恬惟日與士紳文武
有氣誼者遊尋授爲令紅巾起敬與新興判官水兵千戶聯熊
釗樊仲明義兵恢省今嘯臺其遺蹟也後與縣尹橐歡屢挫寇
鋒及陳友諒破省分兵徇邑應援盡絕力屈委城

元

達魯花赤 元監縣官名

李蘭奚回回人監進賢縣十年吏畏民懷始終如一他州縣事
不能決者憲府時以屬蘭奚著能名沒於官
宋例禿字仁卿蒙古人至治間爲進賢監縣有威德嘗修陂墻
八百餘所民甚利之

袁州海牙字伯源高昌人至正間由進士爲進賢監縣公勤廉

進賢縣志 卷之六 五
能興利除害增公廨新學校士民甚戴之

知縣

明

施皓乙巳年任癸卯明太祖取南昌郡胡廷瑞歸附踰年公受
事兵革煨燼之餘辟草萊新學校奠安士民爲邑功首

梁璧泗州人洪武元年戊申知進賢廉明果斷囹圄空虛吏畏
民懷立清政坊自期祀名宦

鄭止中浙江麗水人廉勤慈愛御衆以寬民有過每不忍刑而
徐以禮諭之曰我爾之父母也忍不爾矜乎卒於官民痛之

陳有常丹徒人洪武進士甲戌年任廉公有威陞刑部主事歷

湖廣按察副使

拔鎮江志作任姓
縣舊志作監生

李思中荆門州人繇歲貢洪武永樂間任公勤自勵臨事寬猛
得宜歷陞刑部郎中

余曜字叔炫莆田人永樂進士任進賢廉介不阿力正上官和
買之弊政平如水民不忍欺陞吉安府通判掌太和縣縣大治
楊少師士奇贈以詩曰澄江一道分明月照見余侯一片心誰
謂今人不如古古來循吏卽如今母喪解任復判饒州府

張冲字宏謙龍巖人歲貢正統初任廉明強幹禮士愛民重名
器抑僥倖勸學宮築城垣增圖籍置義倉撫民如子時有蓮瑞
芝靈野蠶成繭號三異焉秩滿奏留復任又九年再留視事卒

於官百姓巷哭祀名宦

呂聲浙江桐廬人天順間任廉直不徇衆作古選以訓蒙作嫁女歌以訓俗造士勤民作社學數十區身爲督課人才輩出政務修舉間左被焚稽顙風反火息虎爲民患公禱神羣虎伏誅比歲屢疫聲爲民禱請以身代疫竟息民咸戴之陞太僕丞吳璉字美中南海人進士宏治三年任廉靜寬平初值水澇申請免租繼罹旱虐步禱得雨民免於災守正奉公始終不苟性恬退引疾去祀名宦

李學會字宗魯茂名人宏治間任廉惠得民興學造士政成擢刑科給事中

姚永正字文瑞宛平籍華亭縣舉人正德辛未任值歲荒流盜劫鄉坊永正率義民江環等保捍東關賊不敢犯後臺司遣將征勦調度軍用而民不擾間帥誅求無已甘自窘辱以保民命逾年感疾卒於任四境哀之

王紀字理卿號順菴泰州人正德辛未進士知進賢寬順公廉邑舊無城庚午盜起郡縣雲擾紀相址計費壘土爲城闢六門門各有樓邑賴保障又建鍾陵書院祀周濂溪置院租并餼守者學使李獻吉紀其事尋平姚源洞有功擢南京工科給事中直諫不避權勢左遷歷州丞累官至陝西僉事祀名宦

劉源清字汝澄東平人進士初任德興調進賢政尚嚴明尤加

意學校勤考校優獎勸凡所賞拔者次第登雋己卯逆濠變起倉卒遠邇震驚侯暨旗邑門大書精忠報國號集義兵斷橋守城又積薪自環其室誓曰戰不利合家就焚耳安能爲賊辱哉逆戚婁伯領僞詔逼奪邑篆侯卽斬以徇賊遂不敢東向事平召拜監察御史尋擢大理寺丞士民於東關外立忠義去思碑亭祀名宦

周崑字孟登號學山崇德人進士由玉山調任威惠並行邑徵收初無定則崑至則懸示於門每糧一石以米六斗納倉銀三錢收庫限三次交完逢某項應解則呼糧長當堂取領起運糧長過取者許納戶當官自納納戶延者審實扑之鄉有積盜夙惡廉得其實輒親履跡捕之面數其罪卽於其所榜百致之死有漢趙廣漢風平時視民如傷卽召杜不能過也以母憂歸官至吏科都給事中

周美字濟叔崑山人嘉靖進士知進賢時多逋賦美每當春農輒緩其征民感其惠賦亦不逋出贖鍰賑饑建社倉飭學宮上計至不能戒行李遷刑部主事累陞湖廣僉事蘄州江防每督戰士遊徼江上得真盜卽殪之弗令扳累善良盜相戒不敢過其境歷四川按察副使

何鏜字振卿號賓巖麗水人嘉靖進士知進賢激揚清風時萬冢宰家居至威重鏜砥礪政事不少徇若邑中興除大利害又

一以平心處之常造孝子之廬葺先儒之亭皆有關風化久之
竟以骯髒遷郡丞去士民惋惜祀名宦後歷本省提學副使
程光甸字子極號南津泰湖人嘉靖進士知進賢敏練有幹才
時南贛盜發兵部奏請郡縣無城者刻期完具光甸計其費不
貲身先經度庶民子來不踰年而工竣崇正間祀名宦
湯聘尹字國衡長洲人隆慶戊辰進士知進賢光明慈恕邑糧
差先拆爲二糧輸於官差則隨事分派於民富者破產貧者廢
業聘尹奉行一條編法計民所應出總輸於官官任其事而民
不擾百姓戴之如出水火他如救疾賑饑修學造士雅多善政
每以一介不取自盟一夫不獲爲恥祀名宦

王亮字茂宏號樓峯臨海人萬曆丁丑進士治縣強項有氣岸
見事風生奉檄清丈土田事零雜易於爲奸亮約束簡便大抵
令民自占實而期以一日攜飯糗偕里正履畝間丈數坵小民
不擾於供億而豪猾亦無所藉手三月報竣其爲政廉敏大抵
如此召爲兵科給事中

林道楠字廷任號柱宇莆田人萬曆癸未進士令進賢時丈量
初定道楠於上中下三則初欲以水鄉盡賦下田東南中上然
後竟均派歲饑掉小舸徧歷窮村計口給粟民受實惠有生醉
犯規引至後廳戒曰秀才當家居讀書曷入公門爲竟無他督
凡小民一經其面數年後猶能呼姓名道顛末而又未嘗鉤距

以爲智也爲人貞亮和粹巨細不苟戴星出入者六年如一日
毛一瓚字獻卿號肖寰浙江遂安人萬厯壬辰進士天性清剛
下車剔釐夙弊吏胥不寒而慄里中豪素以氣力凌人者畏一
瓚風采折節更學爲長者然瓚以嘖笑爲賞罰未嘗苛責也治
賦無耗聽訟不入金矢口裁曲直各受理而退建文筆樓結彥
社以厲學宮尤夙負人倫鑒識熊宮保明遇於初試期許大受
他若李侍郎光元陳布政應元陳職方維謙皆屢拔前茅每促
席談古今事則以忠孝廉節相勗嘗緼袍粗飯曰吾非不近人
情奈土瘠何有同籍持節過縣心疑其飾廉排闥入內署見家
人坐簷下結巾廚中惟蔬豆篋中葛巾而已其人嘆服而去題
衙齋云蕭條如古寺寂寞似枯禪書廳聯守身如女愛民如子
皆實錄也擢入吏部秉持公正人不敢干以私至今浙中銓席
推爲先輩典模祀名宦

黃汝亨字貞父號寓庸仁和人萬厯戊戌進士爲政嚴明整肅
人不敢犯酌利害而興除之先是邑漕粟民募艘轉運章江自
與軍交兌苦於久泊軍伍復難之吞漁無不至汝亨憂之乃建
倉會省倉成魚貫而兌悍卒無譁百年之弊頓洗一時鄰邑競
效之所著倉規纖悉備至事具兌倉記中他若準田賦以編役
立社倉以備荒圩豐樂以奠水鄉梁羅溪以起病涉表章書院
廣厲學宮邑士子咸彬彬向風焉置徵輸易知單每先期人給

一紙胥吏不得欺三老三老不得欺愚穉乃法之最善者後人非不知之而發單多在糧完之後民視之同故紙矣在任六年使車絡繹簿書旁午而問字常滿戶外雍容酬答畧無瞋委時時行縣勸課嘯咏林間不啻子瞻之在杭也陞禮部主事歷本省提學副使有人倫鑒識轉嶺北叅政家居久之擬推卿寺矣會西湖魏瑞祠成過而不拜羣小共擠之鬱鬱竟不起後潘曾絃爲之請贈汝亨深通性學文章雋雅所著寓庸集行世周光祖字伯繩號韋西崑山人萬曆三十二年任侯以名下士蒞邑風節自勵凡便民之政知無不行修羅溪堤置學田每名勝之地輒爲表章值歲薦饑與熊司馬議發倉粟分賑各鄉後他邑有攘庫者乃謂司馬曰公謂善守不知善散於是驗矣仁人之言其利溥哉公敬賢重氣誼好談當世事葺賓館題曰南州分榻禮接士大夫延見諸生無虛日然皆未有干以私者蓋一時士風崇尚名節如此

錢士貴字元冲青浦人萬曆四十年以進士蒞邑清廉和惠視邑如家值癸丑甲寅水災力爲百姓請命於王太蒙撫軍改折漕南二米更發粟賑施民賴全活平居不名一錢入覲無長物僦驢以行時福清相君訪聞其賢亟贊之得選爲給事中亦不謁謝也士貴旣以風節自持時局蒼黃無所依附是以浮沉仕隱晚卽亞卿有弟世貴崇正時舉進士令諸暨尚遵守其風軌

焉

沈景初字君復號日倪餘姚人癸丑進士先選虔之南康以丙辰知進賢景初爲吏部尚書雷門公子能菜食而憂民深廉潔通敏雖寒素老吏弗如也邑屢年薦饑公至而勘恤懃懇兩臺請命戶部覆題報可許以白金五錢代漕米一石率石紓三錢又請權金頒賑下鄉五都濱彭蠡景初露冕行野澤中督其繕防且拯拯不遺餘力建學宮之城門榜曰文明庀飭廟堂庶宇皆擇罪人輕科俾負插而兼以無業貧民故成功速而民不知也坐堂皇剖決如流其他存問鰥寡稽課儒效煥然神明已未授禮部主事踰年擢吏部

梁應材字四多號瑤石陽春人至縣每旦必焚香拜天視事大小立決治賦以勸諭代拘攝其早輸及額者卽識之曰若賦足矣無煩再來以是民德之賦亦辨訟牒至但取平情不責鉤束之入俸餘則以修學課士拔士之賢者以經術勗之杯酒款洽每談至夜分不倦及崔魏竊柄江右諸君子多所摧折令婉曲調護左右風節尤人所難丁艱歸補蕪湖以人望擢兵部頃之調吏部人不敢干以私攝考功郎以覆疏起註誤之臣鑄級里居廉不絕俗古之所稱易直子諒者其庶幾焉

蔣德瑗字仲陞別號鍾湖晉江人天啟五年進士知東鄉調任進賢邑衝繁視東鄉數倍下車首問民疾苦事不便於法者悉

道賢縣志 卷二
裁罷務在簡靜以休民力卽拮据征繕然不甚用追呼隸也維時獄無煩繫萑苻無嘯聚惟酌水賦詩恬然自適捐貲刻邑乘俸滿選入諫垣至今民戴其清靜云

王楊基字爾抑號石雲潛山人乙丑進士初仕錢塘以抗直左官藩幕攝新建當會省繁劇單誠心布實政咸稱其能稍遷令東鄉民悍多盜侯徬尹翁歸籍記吏民賢不肖以一警百踰年盜息民安調任進賢廉平不苛力行教化羸民始有起色逋賦亦輸以最當擢值臺使新邑之城復留基督之城完則又以他逋滯迨甲戌之冬考成乃如格也侯所至有聲而素知進賢疾苦獨委曲紓之以勞望轉監司旋擢湖廣巡撫

葉士魁字子微西安人崇正庚辰進士儻爽易直不設城府而議論務本於忠孝治獄持平時督賦方急委曲勸諭不忍以鞭扑立威也值大造均圖覈丁恒曰吾浙前輩每言丁不過都謂本都豁一虛丁卽於本都米多者補之不累別都也然亦不多加大畧卽新收多至數十石者加至二三丁而止目擊賦重民貧每抱杞憂未幾值會城議論不一解組徑歸

黃庭師字調兩福建晉江人己未進士本年任進賢寬厚長者悃幅無華會邑多逋以撫字爲催科民不爲擾日與諸生論文剴切有加其有偶涉註誤者用觀過知仁法曲賜保全在任無赫赫名久而人益思之陞戶部主事至光祿少卿

署縣

黃奎璧號去華建寧人萬曆丙辰以按察司檢校來署時錢元冲仁明廉介之餘新失慈母奎璧承其後孳孳愛民率六隅鄉約百姓講陳聖諭敬禮賢士談義理終日忘倦不事擊斷惟以誘化爲心斷斷潔已不名一錢去時無纖介長物蒞政雖數月民之戴之無異錢君也

戴文亨豐都舉人萬曆二十年判南昌府署縣事清廉明直案無稽牘催科不擾邑人德之

姚元愷字虞公浙江餘姚人太僕卿元素公子崇正戊寅以布政司經歷攝縣篆一年不敲扑而賦亦辦智足應近世之變寬足得士民之心小大之獄必以情號爲風雅云

縣丞

明

寇鍾歲貢零陵人勤慎一介不苟取於民蒞任九年始終如一秩滿陞宜州判

主簿

元

段從周字郁文大德間任文雅精察不苛時賦役之籍不明富者詭寄飛洒以避差役貧者苦之從周下令許民自首咸畏其精敏不敢犯卒得其實與縣尹完顏璧同時皆得人心云

明

孟繼芳金華人明初主進賢簿兵荒之後繼芳佐長令拊循貧弱招恤逋亡征斂有藝徭役有次饋餉不勞戶口漸實復鳩工葺學舍士民德之嘗於廡旁作野軒邑人包宏爲之記秩滿去趙麟大名人以才薦主進賢簿奉檄督造紙郡立厰西山逾一載疫作麟憫之白於藩臬曰邑有榭山楮竹粗有且民安土無癘瘴功易成而生可必否則民死大半猶無紙也藩臬然之聽所爲民感之競樂趨事滿九載咸惜其去

尉

宋

黃汝嘉不知何地人淳熙間尉進賢是時尉廡爲臧嘉猷讀書處汝嘉從廡西作三賢堂祀梅福魏徵士及臧嘉猷以寄志千載而下猶想見其襟期也

教諭

元

韓炳正字九臯長才博聞正氣直言人士推服

明

丁之翰字季藩濟陽人幼從父儼講學資穎超絕稍長業五經著文名壬辰兵燹奉父母避難郡城時城中饑疫罄囊以贍嫗族隱居屢薦不起明初授新建訓導遷進賢教諭十年徵爲主

事復以疾辭還職性剛介不隨流俗造士以明理為先自號潛夫

周儒字宗魯黃岡人貢士成化間任持身端方言動以禮擢知縣

李寅字守正黃巖人舉人宏治初任剛方為諸生所憚上官有
待以非禮者幡然求解諸生詣臺省懇請勉留半載竟去

胡士奇平湖舉人慷慨有氣岸一時士子慕服臺使重之陞國
子監學正

李樹敏臨川人萬曆乙酉經魁署進賢諭質直無機械春秋丁
祭舊以故事應樹敏先期埽除索儀注考究簠簋籩豆之數醴

薦尊俎之儀齊宿儀門下三日屆期質明將事儀文翼然百年
僅見也諸生新進有家貧者悉還其束脩其敬士而愛人類如
此

王秉乾字以巽臨川人丁卯舉人每春秋祭祀獨敬謹集諸生
純飭者將事彬彬成禮抗直自持不懼強禦士之才而自愛者
謹護之否則不少借以顏色後遷丞長沙又以便民事與貴藩
相齟齬遂去官歸

訓導

詹淙字子源浦城人幼穎敏強記旁通陰陽諸書正統間任善
誘後進多所成就擢南昌教諭潮州教授卒於官

進賢縣志 卷之六
李實字勉恕新會人貢士成化間任砥礪名節力學不倦動以
古人自期擢南京國子學錄

譚一鳳字文瑞無錫舉人正德間爲邑訓導值獻吉李公督學
江右毀南嶽廟爲書院一鳳請以其地易福勝寺址建之榜曰
鍾陵書院祠周子復修縣志祀名宦

李嗣晟字子忠吉安永新人少以文豪於鄉擴落不矜細行常
與吉州士夫講學雄辯驚坐王塘南先生爲之屈服晚年以歲
貢訓導進賢值水荒俸不足供薪水掩戶讀書精研性命日與
諸生顏燧輩往來唱和題其署曰兩個心知風與月十分春色
酒和詩陞南昌府授以爭學基去當事惜之

附良吏遺

元

伊吾氏長安侯監龍興郡初郡政煩苛恒毛舉求覈督迫追呼
踵至旣獲其求乃飾欺反命焉而郡之政益不治伊吾至與約
曰曹以一人踐更伺於郡事之棘者刻期督之向之吏徒足不
履縣而政大治矣

此監郡之賢者而邑人德之附見於此又元隆興郡侯安哀
亦有德於縣有四言詩二章見詩集原跋

田德榮潁川人爲豫章郡史至正二年仕進賢時賦輸之隸於
官者多爲主典所侵沒米三千斛鈔二萬緡德榮受郡檄來督
不數旬悉得償蓋能制權宜著誠恪矚然以廉介自持雖杯漿

不取也

國朝

知縣

徐鳳鳴字祥宇遼東人久歷行陣木彊少文與士民語皆直吐胸臆士之鎮靜者尤加敬禮催科亦有成法壬辰仲冬之晦土寇闌入縣侯獨身與鬪面受一矢截矢追賊手戮四十餘人邑賴以安

王斗樞字均五諸城人解元進士初授崇義令順治乙未銓試改補知進賢縣甫下車卽繕城治兵除荒禮士哀鴻以集先是令此土者數以叅罰去本折積逋至十有餘年考成不少假俟爲權其緩急令田鄉或輸粟應度支地鄉得輸銀應解額里甲便之有遠年漕欠無從徵比者爲變產代賠七百三十石有奇民不擾而賦漸足當是時丈量久未報竣文廟啟聖諸祠荆榛滿目次第經理構造煥然改觀又開墾荒田若干頃得加級予優擢山賊湖盜之竊發也凡三奉檄進剿侯緩帶臨戎皆設奇計禽其渠領餘黨解散督撫交章稱能焉徵輸稍暇卽與諸生輩論道講書徵文分韻達夜分不少倦訟獄金矢纖毫無所取康熙壬寅遷戶部主事將去邑父老子弟方謀尸祝侯辭曰吾無德何可累桐鄉也遂改置壇山書院時人以比趙清獻一杯亭云

聶當世號二瞻湖廣監利縣人順治戊戌進士康熙三年任邑承兵燹後百度破碎當世曉夜孜孜以修舉廢墜爲亟首新學宮飭城垣建倉廩梁羅溪橋及托固百丈池溪諸橋又建伍相祠最後纂修邑乘捐建保赤堂凡事之有待於新者無不新而總以克己裕民爲本務是以輿情鼓舞樂効子來邑副使饒宇棻請各立碑記以垂不朽當世曰吾盡吾職後有同志嗣而葺之亦職也奚以碑爲棻因爲保赤堂記併詳庶績尋以內召陞去

胡鼎生字還竹竟陵人順治己亥進士康熙十三年任適軍需急數月不雨夏苗將稿鼎生仰天呼曰吾民何罪罪當及余謝車徒步走城隍廟朝夕祝不雨乃更卸冠服跣兩足行烈日中三日膚盡脫不雨遂大哭百姓亦哭卽命吏取重械自肩以朱署曰失職令某虔祝如前是日卽雨境內霑洽歲乃登是時耿精忠以閩叛大將軍率八旗兵數萬駐城內鼎生儒雅善射日左右將軍將軍稔其賢深加愛重解袍帶贈之牧馬城外有人百姓家者誤傷其馬將軍怒欲罪其民鼎生泣請乃止每顧民曰吾爲若輩不知膝之幾屈也縣北界餘干地卽彭蠡東湖賊出沒無常鼎生防守不少懈嘗以數百人殺數千人自是遂不敢復窺縣屹然爲東南捍蔽厥功豈在一邑也他惠政不勝書尤喜文愛士如性命後行取御史去邑人立碑思之不忘

梁崧年三韓人康熙二十一年任年方弱冠而才過老成時三藩叛軍需煩急崧年苦心調劑緩急適宜民咸竭力輸將不及亦未嘗鞭扑從事至於夫頭索帮里長科派概行禁斷嘗傾囊僱募厨無隔宿不恤又城垣傾圮值旱潦相仍而時絀舉贏糾工代賑公私兩利嗣以歲稔令民各出升斗合貯本鄉出納聽自便由是四境皆有以待不虞且善發奸摘伏使閭井肅清故其始至也吏民易之既而畏之久益愛戴之任四載以卓異陞去

尚崇震盛京人治尚清肅執法不撓釐奸剔弊動輒如神先是邑徵法每圖設里長一人主催收徵冊注合圖總數官不知民民不見官惟里長是問名曰捆徵以故零星小戶過手侵漁而故家右族體統素嚴里胥往往不敢過而問焉由是新舊逋累前後比追至一歲充役六七年猶應比期者皆是也康熙己卯崇震銓任進賢甫至省卽聞邑罷頑狀下車勒限嚴追不應卽加考掠亦不應一日閱比簿但有里長而無花戶名始喟然愧悟乃下令曰糧從戶徵戶就官納里長主催不主收歲二月開徵十月全完分爲三卯卯各輸三之一玩延者官自提究違限三日雖輸亦懲當是時闔邑震懾豪右奪氣莫不踴躍輸將數十年罷頑之習一旦廓然已乃設立滾單每一甲一紙以糧多寡爲次第單到赴納送交下家鞭扑不用追呼無聞鄰邑則之

進賢縣志 卷之六
遂爲永例

張貺字方曉號頤菴四川威州舉人康熙己丑任天資佚蕩學有本源約已愛民尤好獎進善類常與邑中名宿切磋道義取士之尤者育於署授以經史古文如陳大晟齊之干皆莫逆交至舒雨水香尤其陶鑄而成之者也邑西羅溪橋堤當縣治孔道長二里許被水衝決殆盡貺勸諭捐建數月而功成尋行取陞主政去

石廷銘山東舉人雍正六年任清苦精勤食不重肉服惟布素蚤起坐堂皇至暮始罷訟牒聽民自便情理未協面予批斥受理事件計里差傳兩造具備虛衷剖斷民無枉抑命盜重情節騎一驢徑詣驗勘皆得其實下車三四月訟爲減半期年門庭闕然農事畢令村庄各立窩鋪守望相助間昏夜單騎獨出不知所之雖寫遠亦驀然而至於是人自爲守盜賊屏跡任甫二年以事解官去士民咸嗟惜之

劉象賢號泗水漢軍舉人雍正九年任持躬方正臨事精明人不敢欺邑自前明黃令汝亨請建省倉民免江兌旗軍勒索之苦風波耗散之虞然漕規條目自在也向例運米入倉者主吏給以倉收赴縣換票則有贈軍有隨漕有兵折有兵米猝難取齊大率官墊起運而後分徵此外尚有修倉墊倉由票謂之津貼亦逐款徵收於是催科之役往來不絕加以零星小戶科則

無常十難償一官不勝煩民不勝擾蓋非一朝一夕之故矣邑武庠傅以滄周紫垣商訂統徵分解之法以請於賢賢曰害不什不更制利不什不變法若此法行則是去十害而興十利也慨然上請一再駁終允行之大率正米壹石帶徵銀若干民自合輸官自分解一切煩碎盡然歸一其爲德於進豈淺鮮哉甫二載調繁豐城進民請留於大府者萬人弗獲民至今歌思之溫儀字可象號紀堂陝西三原人癸巳進士授編修辛丑改授進賢知縣天姿明敏而臨事一本靜重於胥役寡嘖笑愛士如性命雖造次必假體貌以遠大相期審理詞訟準情酌理非甚謬戾不加鞭扑一時舞文健訟者爲之帖然常以儉德先民服食惟甘淡泊下鄉按驗父老具火酒一樽雞子數枚輒欣然命酌其獻盛饌者却之童叟環觀如依膝下豐歉苦樂咸得自言在任四年擢保定守尋陞霸昌道引年歸

姚夢麟字獻徵蒙自縣舉人乾隆八年任起家寒苦樸遯性成不以搏擊見長始至值穀價騰踴每石二千而倉儲所餘止四百餘石不供平糶民大闕歸咎前令幾成大獄麟急請上游調撥楚米來縣少支接濟又勸捐闔屬富民出穀自數石至十石合米二百作糜散給全活甚多又以縣城久敝詳請興修借工代賑藉備以活者殆數千人後以才力不及改教去士民惜之向德一字輔世號蘇村湖南澱浦舉人乾隆丙寅任老成幹練

情僞周知始下車案牘山積辦理精勤賞罰明允告期訟牒常數百當堂批摘裕如案無留牘以故數月之間僉稱神君訟風頓息爰召諸生面試於庭講論親切首捐百金倡建曲水書院舊有官田二處可六七頃向輸國課外盡充官橐德一盡捐以供書院膏火卽具文上達著令交代以垂不朽延名儒錄俊秀時時親臨甄別優劣復增田五十餘畝創號舍二十間俾臻完美旋以二親年老乞養歸德一去後邑有陳何二姓族蕃人衆互爭草洲各斃三命旣罷有寡婦子何蘭仔放牧歸被陳姓擒於土庵殺而沉其屍其母籲冤後令袒陳而坐誣於何被叅去獄久不決丙子德一終養服闋坐補進賢大憲屬以此案微服行訪悉得其狀且聞庵僧與卜者目覩其事逃之新建旣抵任陰遣役捕證人親鞫衆犯不承遂扃於署之西園差幹役諭指詣陳起屍役如指詣陳皆佯爲不知役叱曰某已招矣但隨往自有其處咸愕然偕行役指湖心叱取果得竹篋支解貯之而二證亦至歷白蘭仔環跪乞命不許及謀殺滅口狀由是一訊立結皆伏辜邑西羅溪橋堤二里許被水衝齧殆盡工鉅而費不貲向來皆派於民德一獨以民不堪命力請帑金躬自督理至今崛然成金堤云

陳德林號猗堂山東滕縣廩貢乾隆三十三年任爲政廉謹屏絕陋規徵斂錢漕權衡斗斛甚平尤愛養士類邑曲水書院前

令去任取其租入充公致膏火不給德休捐已貲餉之每課必親臨考校弊絕風清稍暇惟以詩畫自娛惜不久任二年以父憂去 以上舊志

張永湖安徽祁門人監生乾隆辛亥任清廉愛民代完民間積欠至萬餘金慮後任以爲利而擾民因取徵簿悉焚之 採訪冊

縣丞

黃錫蒲字昆雲雲南廣通人乾隆戊午年佐縣事悃愾無華遇民事必委曲勸諭不輕用鞭扑延禮紳士恒於端方有品行者加厚焉凡修學與城大工役贊襄甚力每歲監收漕糧居省倉際已奉公嚴斥弊竇兌者稱便以事往鄉平易近人事在可已輒已絕無苛責上官嘉其賢屢委署令事俱有聲在進二十一年始終如一人無間言後以老致仕去

彭鏃字鳴玉號韻亭湖北漢陽縣人乾隆二十四年任平易近人敬禮賢士以氣節自持非公事不謁長吏然遇聽斷大事有未得其情者必入告亦不使外人知也當迎養時乃翁屢出家貲佐用惟以作好官相敦屬由是飭篋篋益力已卯署本邑令數月知無不爲在任十餘年以病告休

鄒繩鉞江南無錫縣人乾隆三十七年任侍郎一桂姪也立身樸誠每紳士來謁輒談文藝日昃不休居官一本厚道鞭扑未嘗輕用尤廉介嘗奉差出眷屬不能舉火至有啼饑聲長吏李

進賢縣志 卷一
升庸聞而駭亟遣人餽以米歸仍典衣償之以病卒於官合邑
歎惜好義者爭爲賻藩憲秦公悉其貧爲之經紀始能歸葬

典史

朱士任順天宛平人乾隆丁亥年任本世家子以風格自標不
屑爲俗吏熊子近曾以少年成進士將除官欲迎養弗許曰各
事其事卽各報所報敢以未老於汝求安乎尋以內艱去
胡永錫順天大興人乾隆丙戌年間由生員署縣尉居官一循
循儒者口不言利利亦弗之及四壁蕭然晏如也或問之笑而
答曰生平不解營謀爲官詎能驟學矧官以禁邪奈何以官邪
乎兩署進賢尉俱以誑誤去士民共惜之

教諭

胡緯民字武孫瑞州新昌舉人雍正五年諭進賢高才博學爲
制舉藝能神明先正矩矱以合乎聖賢之旨喜作養人材有一
長輒傾吐所藏娓娓不倦每扶持善類勢利不能回常與長官
爭是非曲直而不爲脂韋迎合之爲前後二十一年邑大夫皆
雅相敬禮無齟齬者臨川李穆堂絳目空一世嘗過進一見握
手曰心交久矣奈何以名宿而老於青氈耶其推重如此所著
有桐洲集詩古文若干卷卓然成一家言

以上舊志

鄒在保新淦舉人乾隆庚子年任教育士子必盡其誠從之遊
者如坐春風中

郭嶸都昌舉人嘉慶丙辰年任其教人傾吐無不盡凡學爲文者經其指授皆有法度可觀

訓導

侯章崇仁舉人嘉慶丙辰年任以禮法自持師嚴道尊而性情和易人畏而慕之樂從之遊

進賢縣志卷十七

人物

世言辭章無當真修科舉難收實效似矣而不盡然夷考進之先正名公鉅卿事功節義炳炳麟麟項背相次乃至一官一邑所在流聲率多建樹大約起家科目者居多若夫質行古心名教自任幽人義士志節皎然斯誠不假辭章科名而顯者譔次之餘并附以寓賢方術志人物

良臣

宋

吳居厚字敦老豫章人舉進士第元豐初提舉河北常平又爲

京東路轉運副使卽萊蕪利國兩監官自鼓鑄贍足一路拜天章閣待制升都轉運使又請鑄大錢以一當二歲出二十萬緡佐關陝兵食神宗曰居厚于分職之外卹及他路非才智有餘不能元祐初朝廷稍更新法以寬大爲政於是御史言居厚苛刻責散官黃州安置尋知廬州紹聖初以集賢殿修撰爲江淮荆浙等路發運使旋復舊職疏支家河通漕楚海之間咸賴其利召拜戶部侍郎更尚書以龍圖閣學士知開封府修奉永泰陵居厚爲橋道頓遞使出知和州創將理院及醫藥使病者有歸多所全活除戶部尚書拜尚書右丞遷中書門下侍郎大觀初請老提舉鴻慶宮久之起守本郡徙帥河東過闕復拜門下侍郎知樞密院事乞改重幣爲當三以息貪夫盜鑄之患時遣使至居厚言于徽宗曰盟好不可違也願益敦信誓以安敵情徽宗嘉納焉以武康軍節度使知洪州踰年卒贈開府儀同三司以下俱本省府志舊縣志

按居厚之墓及第宅基址以至遊觀之所俱在邑之歸仁鄉故老相傳其事尚厯厯也但元豐前進賢未爲縣故通志載洪州人舊志列本縣甲科之先非實錄也以首人物可無譏矣原跋

簡世傑字伯俊隆興進士初任靖江府司理參軍遂徙居焉外邑以盜上府凡六七人傑廉其非是後果獲真盜時叅政范成

進賢縣志 卷十七
大爲帥將劾令而賞之世傑力辭且謂令誤非有他成大益賢之暨鎮蜀辟入幕府汲引蜀士皆一時翹秀改知蒲圻縣政本豈弟行之以信不設科條民不忍犯知賀州嶺外官自鬻鹽人以爲病遂一切罷之楊萬里爲撰墓誌稱其學問通古今議論守大體所居不赫赫所去民見思云

陶夢桂字德芳嘉定進士積官至朝請郎岳州通判歷任十一而外辟者九出入江淮荆蜀二十餘年議論高爽氣貌嚴凝人視之矯矯如野鶴不敢以爵祿牢籠之故居官得以行其所如愛民力修軍政邊臣不論文武皆赤心與交營伍將校亦加款接自岳州歸里宣諭李公辟知容州不赴深坐一室羸童蹒跚日汲水濯菖蒲爲供芻衣糗飯簡淡自處自號平塘老人以壽終有吟稿若干卷

胡文舉字仲明崇禮鄉人寶祐癸丑進士授寧國軍主簿調贛縣尉未至有訴殺人而失屍且不見殺者公下其事一日池出屍無首詢死者之母云臂有涅痣視之果然又廉得其妻與同舍男子通急召男子別鞠其妻妻疑事泄言實與男子姦共殺夫而葬其首掘得首加屍如生咸以爲神自是臺郡疑獄多以屬公雩都民誣死者五人公讀其獄得十疑白之憲守吳公更鞠咸釋其冤辟州錄事叅軍勤慎明直人無疑罪峒丁亂俘纍纍哀矜之各得其所部使上功於朝受浮梁縣丞以歸自號秋

胡霆桂字直翁文舉姪開慶己未進士爲鉛山主簿公清嚴毅時私釀之禁甚嚴有婦訴其姑私釀者霆桂詰之曰汝事姑孝乎曰孝曰然則汝能代姑受責矣以私釀律笞之政化遂行宗室寓居多不輸田賦霆桂繩以法卒爲所誣免歸著書自娛天經地志禮樂名物及醫藥卜筮之書無不究覈號寬居先生所著有易傳律論經史雜說居業集子志道咸淳丁卯貢士

楊龍偉字卿雲世爲水北人咸淳戊辰試禮部第一授番陽主簿時信州軍亂提刑檄龍偉往視戮首惡數人餘皆釋之邑大饑民相聚爲盜故事義倉非朝命雖持節使及有朝命而無臺

檄者皆不敢擅發龍偉曰事急矣獲罪所不辭也乃發廩以賑之民遂安以疾歸築室北源優游其間因自號半園

王定孫字靜翁咸淳進士歷贛州司貴溪縣尹福建鐵冶提舉邵武錄事龍溪尹初仕貴溪參用舊典貴人安焉平反邵武何姓殺債主而誣其妻之獄在龍溪盜掠晉江許祥德家盜逸逮百餘人死者十二三會民有商去不及偕往者歸母媪以訴詰之并得掠許氏盜枉者以釋先是盜發鄰境雲中孫萬鎰爲憲司書吏沿檄招捕頗著清聲民爲立碑後稍以深刻損譽一日會明倫堂孫語侵定孫定孫面數其所爲引椎碎碑而出宦遊皆劇任具資裝以行所至秋毫無取

趙汝僨字和仲宋昭承皇太子六世孫雖帝胄而澹然守布衣之操以漕貢仕至永興縣丞真文忠公嘗以困窮之節許之年未六十卽棄官結草堂於縣南蛟坑之帶山屏絕世務怡然自樂年八十一而終號帶山先生

元

合

不

持

誠

誠

傅箕字拱辰行誼載良吏傳陳友諒爲僞平章聘之具書辭曰僕聞君子居上以愛人爲先居下以敬身爲本在各盡其道也今閣下以雄毅之姿英邁之畧糾集羣帥起兵漢沔而威吳楚凡行師立署所至之處能者使才者用賢而有德者尊禮俾各遂其性無意于富貴功名者不強以職此所以超軼羣雄者也而今委差學官徵聘賢士濫及於僕僕生長寒素性本林泉倖祿養親偶叨科第實則學疎不踰時輩貌陋不逮中人久纏風疾左體痿痺幾至危殆且未五十齒牙半落耳目昏瞶神識耗減視息人世知復幾時惟甘分編氓優遊卒歲身死之後論者必曰傅某生進賢官進賢終進賢可與古之鄉先生者侔無大益於本朝幸不得罪於名教其亦閣下政之所賜也聖人云君子成人之美羅隱前進士錢鏐不屈以官晉氏失政權陶令歸守其拙下敬身而不苟墮其志上審勢而不用非其人成人之美孰加於此

熊釗字伯幾邑之北山人高宗純有文學仕宋爲提學官父元

誠篤信雙峯饒氏之學釗幼穎露比長以父命從廬陵王充耘
受書從陳植受春秋從蕭葵受詩元至正甲申遂以春秋領鄉
薦爲崇仁學官釋奠之日虞文靖躬詣酌酒與諸儒賀曰師道
有人矣滿考復爲進賢學官適徐壽輝兵圍隆興釗與里人樊
明仲倡義立營柵阻湖以守北山時郡城受圍五十四日外援
絕釗出奇兵與戰賊稍却因遣人持蠟書踰城城中乃併力出
擊圍遂解守臣嘉其功承制署南昌主簿自是水陸守禦凡七
寒暑以積勞授將仕郎臨江路知事已陞登仕郎守臣承制加
帥銜俾建閩如開府儀得專辟召典兵至今人猶稱其里第曰
院前也遷江西儒學副提舉城陷守臣逃公以策干大帥火爾
赤不能用友諒亦欲陰致之公遂遁山澤中日與門人樊葉楊
子時黃宗載樊鑑樊舒墳魯孝思劉全節等論道講書四方負
笈景從洪武初遣行人鍾呂造廬召之始赴京命經筵侍講校
書史館書成賜宴甚渥時年踰七十矣力請得歸初丞相意憐
眞班將兵恢復江東西愚民誑誤連染死者衆甚公爲招諭復
業多所全活蘄黃富民數百艘避兵泊北山里中豪子弟疑爲
亂將篡取之公偵知非亂者力白於衆遂寢當搶攘之際民不
得耕桑歲饑人相食公力請於省守臣發米賑拯公嘗自誦曰
吾生平無過人者世亂造千人之命年饑起萬家之炊如斯而
已矣居恒修德講學一遵濂洛所著有學庸私錄論孟編春秋

起鑰五經纂要杜甫詩註諸書

明

向寶字克忠十三四都人洪武甲子進士授兵部員外郎擢通政使以不善奏對辭改應天府尹建文中謫廣西永樂間復原官坐累繫獄左遷兩淮運判宣宗嗣位召爲都御史兼詹事給兩俸旋長南院以老疾致仕寶儒者有醞藉歷官廉介終始不移著疎菴稿

按人物志寶作瑄

曾振字孝思洪武癸酉以春秋魁於鄉授汾洲學正復除桂陽州永樂間考績至京適給事中缺攝科事尋補泉州府教授召入翰林與修四書五經性理大全學士胡文穆楊文敏諸公深器之事竣賞賚還任名士大夫出其門者甚衆宣德初秩滿引疾歸以清修訓子若孫

陳謨字古訓八都人永樂初選貢中秘與修永樂大典歷中書擢禮部主客主事儀制郎中爲尚書胡濙所重國家大禮多與議論改武選以介著陞四川參政謹慎愛民大臣交章薦將大用召至京而卒

黃子威名輅以字行八都人洪武末以吏員舉孝廉歷事部臺文無害署屯田主事授四川按察照磨河南按察知事山東按察經歷丁艱改長洲縣丞滿三載考擢刑科給事中遷刑部員

外郎永樂改元吳松大撈用蹇義夏原吉薦擢守松江值饑疫
交作發廩蠲稅民用少蘇詰奸雪誣持虎符發松江市賈更番
之浙右鑄錢子威請罷鑄役第令收故錢如數行制曰可後疏
免解京營造物料民乃獲寧至其減除虛稅爲松無窮之惠百
廢具興尤嚴於治惡往來二十三年與蘇州守況鍾齊名焉孫
伯明仍以椽起家然止得常選無所表著於世而邑有章高者
以椽任五河典史功陞濟南推官兩攝府篆平反疑獄捐俸賑
饑全活數萬人其績甚著皆邑一時盛事也 聶志

熊鍊字學淵北山人宣德進士授刑部主事以疾歸起調工部
都水司奉詔治水於竟疏濬有方改大理左寺正有誣僧妖言
法當死獄成衆莫敢辨鍊獨慨然曰一僧詎足恤但明知其寃
而莫之白謂官守何力解之僧遂得免遷浙江提學僉事廉介
正直以身爲教不事條約所至宿止學宮與師生講論不輟較
藝精覈高下不失錙銖久之士風大變改任湖廣遷廣東右參
議適有採珠之役鍊區處得宜民不知擾瀧水諸洞叛民困轉
輸竭力規畫得以少甦天順庚辰起遷廣西右布政使越五載
疏乞骸骨上可之命有司存問旣而進階正奉大夫正治卿歲
給廩五石鍊爲人負氣節有才力正直不阿居官三十餘年不
異布衣時知人甚明君子謂其公而無私誠而無僞云

王朝遠名漢以字行三十六都人景泰甲戌進士擢南京湖廣

道監察御史天順中抗疏劾石亨黜知衡山縣未行會天變還職巡按廣東上選將安邊之策猺蠻入境守臣故匿不報朝遠以狀聞勅韓御史雍討平之撫捕流賊綏緝懿民所至揚清激濁貪吏屏跡按兩浙適大比戒主司務崇雅黜浮文格一變還朝預理三法司事陞陝西按察副使值寇入榆林督軍餉有功陞食三品俸進按察使執法不阿威惠大行歲饑奏免稅糧及弛茶鹽諸禁民賴全活成化丁酉擢左僉都御史巡撫甘肅增修墩堡葺理阨塞蒐括隱役軍丁嚴禁和易私賄懿民率服邊境晏然感疾連章乞歸許之抵家逾年而卒訃聞遣使諭祭于大節字守正十五都人以父徙河間之任邱居焉幼聰穎嗜

學治尚書天順甲申進士授行人嘗銜命送西徼番以能聞擢監察御史巡蘇州及大同指劾中使總戎之奸曠者旨如公言巡湖廣聞京師地震上疏入諷語忤中貴調雲南鶴慶府推官俗不知學選其秀民補弟子員親爲指教科目遂興擢四川按察僉事膺薦擢浙江按察使剖斷不倦枉抑用伸乞休許之復起爲山東按察使一載卒性溫而剛愛而篤守已尤嚴名與字洵稱情哉

楊峻字惟高正隅人由成化丙戌進士授丹徒知縣有廉能聲壬辰擢監察御史差湖廣清軍摘發奸弊人稱神明戊戌擢廣東僉事以父喪去補任福建時杭汀盜起當道薦爲汀漳兵備

地方以靖丁未擢浙江按察使有坐報父仇抵死者峻釋之以伸孝子之情時巡按御史失憲度峻劾奏之兩京科道官欲構陷以時方清明竟得直癸丑晉浙江左布政使一剗蠹弊吏不敢欺鎮守方橫取于民督及有司峻面數其罪且欲以鉄索與共拘攣詣京師其勢稍戢辛酉進南京光祿寺卿寺歲進酒以軍民轉運稽程屬吏往往以酒敗獲罪峻請命巡倉者監之始無宿累遂著爲令癸亥引年乞休許之仍賜給驛峻爲人嚴毅剛介有遠識其于政事精敏自始仕時已然居官所守始終如一親喪廬墓至老不宴飲云所著有豐川集

余顯字光大東隅人擢通判初任韶州撫徭民而跋扈者向化進國幣而羨餘者不私繼仕揚州進賀表而郤州縣之路費理馬政而絕里胥之苞苴卒於官民咸哀之

趙總字廷用七都人自幼穎敏補郡庠生成化丁酉領鄉薦春闈中乙榜授山東滕縣教諭清介自持復補濬縣啟迪生徒寒暑不輟凡束修私禮一無所受每遇生員貧不能葬者輒出餘俸以助之秩滿囊橐蕭然尋陞南京國子監博士操守益堅廉介著聞擢壽府右長史不仕而卒

劉佐字邦寧成化庚子舉人歷蘄州判官洛容知縣廣州通判時大帽賊反奉命監兵生擒賊首曾元二等二十餘人事平復征姚源羣盜聞風解散當道交薦因病足致仕家居二十餘年

而卒

汪深字文淵七都人宏治鄉舉授湖廣蘄水知縣清潔自守剛正有爲下車之初訪民瘼革弊政清虛糧四百餘石建倉厰積穀備賑築堰修橋捐資葺學士民祠之名宦

左輔字廷弼三十八都人庚子連第授行人賜一品服持節使滿喇伽國自號瀛海浪仙有詩才生平尤以孝稱滿喇伽者在赤道下去泉州海口六千里朝貢無時著有游海集

季源字本清中隅人器局宏朗動稟禮度成化庚子解元丁未進士授刑科給事中條陳時事言甚剴切奉勅理兩廣邊儲莅事廉恕軍民便之轉本科右繼轉左會有權貴誣撫朝士抗疏論之每疑獄多所平反遷都吏科居諫垣十餘年凡章上輒焚其稿以故人知之者無幾秩滿進大常少卿未幾以親喪去官卒于家上聞遣使諭祭

萬福字季崇成化進士時冢宰王端毅欲釐正鹽法授福兩淮運副分司歲例有餘鹽盡革之又白督漕御史豁免各場存積竈丁銀以甦賠累遷南京刑部郎中轉金華知府會逆瑾遣其黨四出校尉樊信道經金華恨福無所餽誣以廢事瑾屬吏部勒令致仕福心事坦夷天性孝友及入官勤約如寒士子鑑知府銓舉人鏜吏部尚書孫潮右副都御史浩南京禮部侍郎累世通顯卒贈南京右都御史

楊二和字恭甫峻子宏治進士歷刑部郎中知常州有權貴奪民產者執之不少徇陞四川提學副使生平清正常纂修縣志已卯逆濠變助縣合城守民獲安堵事聞詔進秩有差賜崇德嘉功匾旌其門

傅習字本學少苦學以羽林籍領京闈鄉薦登進士授大理評事歷寺正奉命讞囚於河南再莅湖廣多所平反逆瑾擅政嘗欲脫人於罪習持不可瑾怒中以他事逮繫詔獄謫浙江布政司理問已而復逮至京或勸以賄免習委順守正一無所移人危之然其居官防檢素密無可捃摭瑾終莫能害也擢山西按察僉事陝西兵備副使調廣西右江有平賊功進俸一級陞貴

州叅政按察使廣西右布政使雲南左布政使拜都憲卽撫其地前後數任皆在邊方勞績懋著旣被命改南京大理卿當行會有土酋安銓鳳朝文之亂圍逼會城猶力疾討賊賊尋破詔獎加俸有白金綺幣寶鏹之賜旣行至鎮遂弗起年六十有七訃聞命營葬遣官諭祭如制

姜文魁字士元西隅人歷無錫知縣復威縣大理評事歷左右評陞延平知府擢四川提學副使陞大理寺卿以逆瑾擅權遂致仕任無錫感化頑民爲孝子後謀所報德以五百金壽文魁怒而遣之毘陵志稱其存心好善孜孜愛民祀於各宦居鄉時率邑民禦寧庶人叛劉忠義高其大節倡明理學宗旨王文成

極推之非公事不見邑令遇邑有大利害輒條陳當事如後廚庫役之革便民倉之建邑嘉賴焉後公擢任過進邑聞魁故稽首揮淚曰當日公數言地方事心疑其有所私也久益知而今安得如此人太息久之祀鄉賢

朱廷聲字克諧宏治進士授行人選浙江道御史正德初巡視京倉時內臣劉杲趙忠等以傳奉差督倉場廷聲力諍添差內臣非舊制章再上報聞是年疏請誅便佞杜逸遊以安宗社畧曰陛下以英妙之年撫盈成之運聰明傑出剛毅敢爲中外臣工正當悉心經畫以共底隆平之治臣邇者聞得近侍太監馬永成谷大用劉瑾張永羅祥魏彬傅興等六七輩不思朝廷養之恩以圖報稱於萬一顧迺各逞奸計作爲淫巧以蠱惑聖

聰或導引遊畋專事流連之樂或搬弄雜劇恣爲嫉媚之容馳馬試箭殆無虛日忘情作樂每至夜分而又時出輒城東門外微行物議譁然臣愚以爲此必下人傳說之過陛下天姿英邁度越百王而於檢身莅政卓有定見決無此舉一或有之識者寧不爲之寒心念皇上一身天下之主一心萬幾之本修其身然後天下可保正其心然後萬幾可理昵於羣小如身心何管仲曰宴安酖毒不可懷也蓋酖入人口裂肝腐腸禍不可言宴安之溺人心殆有甚於此者臣見先帝夙興視朝日高始退今陛下視朝頗晏臣見先帝咨訊治道日講無虛今陛下日講多

免臣見先帝愛惜爵位賞必當功今陛下賞多冒濫臣見先帝
慎重刑獄罰必當罪今陛下刑多姑息甚至堅執已見拂拒人
言費出無經罔知府庫之空虛征歛無藝不念生民之困苦人
怨天怒災異四起未必不由是數人以致之也臣不及遠引姑
舉其近者言之昔我英宗皇帝狎一王振卒至乘輿播遷幾危
社稷忠臣義士至今爲之切齒且三公九卿陛下之腹心六科
十三道陛下之耳目今陛下於九卿諸老雖曰委以政事事多
掣肘難行於科道等官雖曰授以言責言亦壅蔽不納惟日與
此等小人恣爲遊逸是自疑其腹心而塞其耳目矣天下誰與
共治乎臣望陛下念祖宗締造之難先帝付託之重自今伊始
勵精勤戒遊逸凡百政務日召大學士劉健等二三儒臣與之
商決可否然後下之九卿綜理無偏執無妄舉畱意於難保之
天命割恩於壞法之小人急勅法司將馬永成等明正典刑以
慰先帝在天之靈以昭陛下平明之治疏上忤諸閹意後劉瑾
用事逐諸元老因列廷聲於黨籍勒致仕瑾敗起南京刑部主
事厯陞浙江僉事平劇賊毛湯七之亂轉湖廣按察副使備兵
辰沅購濂溪遺址以興教化累遷福建左布政使在道拜右副
都御史巡撫湖廣議贖罪收鈔法著爲令會荆襄饑疫奏發帑
金賑之流民安集又上言各處土夷爭訟勘官往往誅求以致
生變宜勅雲貴鎮巡官將遠近獄詞督趣勘結其將吏犯索土

夷財物者論戍邊報可擢刑部右侍郎致仕歸平生清白自矢及退處澹若無官里中尤服其品云卒祀鄉賢

王順祺字廷壽北隅折桂坊人沈毅簡靜自號訥庵領宏治戊午鄉薦授南漳縣爲政民懷吏畏因忤巡撫李士實適有石和尚之變委督兵餉奔走鋒鏑者六年亂平竟不與叙因致政歸淡泊自守值濠逆偕邑侯劉源清誓以死殉逆戚婁伯領僞詔逼奪縣符順祺決計斬之濠敗事聞擢知州屢徵不就及卒贈奉直大夫賜諡祭葬祀鄉賢祠

樊準字曰式南昌籍正德鄉舉知徐州廉介強立政務節財先是中使督廣運倉儲其左右恣甚準至以法繩束之無敢犯會貢鮮中使橫索郵傳供億不貲準輒加裁抑被誣逮繫老幼號泣送者萬人抵京事白得調任厯官山西按察僉事

萬鐘字仕鳴福子宏治進士授刑部主事改吏部厯文選司郎中薦陟順天府尹疏上五事一曰清鋪戶以均買辦二曰專選委以均賦役三曰發公貯以均大費四曰溥徵解以均雇役五曰蠲夫價以均恩例世廟嘉納暨遷南京兵部右侍郎再疏七事其畧則廣修船甦貧甲也處工料甦夫船也循舊例重差委也酌起運省船差也清草場足課額也嚴點閱修馬政也審戶則定甲役也上可其奏至今民賴之隨陟南京總憲彗星見應詔陳言一公推薦二辨國是三審蠲除四通鹽法五裕邊儲六

寬矜宥七正臺體八先實務且曰願陛下輟聲容之繁飾畧天下之美觀屏好動喜事之徒斥虛無誕謾之說疏上忤旨爲民仍錮勿用久之湖貴平篁苗叛薦起副都御史總督勘處事竣疏報有專併職任添設叅將增重事權定撥戍兵處補軍餉制御土官均給行糧城守要地修改哨堡安集降苗等事復疏選用官健查補軍額團結村寨廣裕兵糧設立互市開通道路由達輿情疏捕流民存畱贓罰酌量派辦十事上悉嘉納焉陞兵部左右侍郎歷兩京禮刑尚書改吏部考滿加太子少保因推趙文華撫治鄖陽文華銜之訐以考滿欺蔽坐奪職歸隆慶初詔復官歷宦有風采才節兼全王弇州著史料深加嚮慕舒文節亦亟稱之所著有治齋文集祀鄉賢

萬潮字汝信福之孫鎡之子正德進士授寧國府推官擢禮部儀制主事已卯武廟南巡潮與舒芬夏良勝陳九川首上疏諫杖於廷時遂庵楊公稱爲江西四君子世廟錄正德間言事者得復職歷職方以學行推浙江提學得人最盛緣拂權貴意旣擢叅正左調廣西洊歷陝西左布政使兵荒並至綏懷經理陝賴以安先後以治狀聞遂擢右副都御史巡撫延綏至鎮下令恤軍士飭堡墩募勇敢補卒伍墾邊地足兵儲民樂爲用外內寧謐會中浮議當調行至宜君而卒著有五溪文集祀鄉賢傅炯字朝晉幼負大志以書經領正德丙子鄉薦登嘉靖癸未

進士初授刑部主事特改山東道御史巡歷畿南銅陵有鱷富於私家置水獄溺人復善賂郡邑胥吏無敢問者炯身往廉得之置諸辟所至城社一清陞南京光祿太僕少卿條上諸馬政轉大理左右少卿會分宜當國炯恥附之卒蒙忌不遷時有九載卿寺惟作少六部陪點不蒙推之謠然品望則日崇矣陞南京操江右僉都御史適海寇標掠橫恣諸將吏促上聞炯曰么麼小寇何足貽君父憂乃密授方畧盡殲之事聞陞俸一級廕一子游歷右副都御史掌計事黜陟嚴明轉刑部左右侍郎時楚藩疑獄不決上特命按之公悉發其寃陞南京刑部尚書踰年累疏乞休林居二十年日與園翁溪友怡對東臯淡如也又

捐貲修學宮建城垣穆宗嗣位加恩特進柱國享年八十有三勅諭祭葬如例祀鄉賢祠

夏謐字廷義十六都人以儒士領正德丙子鄉薦登嘉靖癸未進士授工部主事分司臨清時有權貴抵關輜重載道公恥之按以關法不少徇乃被蜚語左遷開州判直指使竒其清直甫三月薦陞永平府判旋陞順德府同知以憂歸服闋補漳泉兵備僉事豪黨懾服沿海澄清疾歸卒於家

何祉字德徵北隅人嘉靖癸未進士授行人擢戶科給事中以諫諍爲已任時西北大饑疏請發內帑蠲租稅民賴全活尋以母老乞便養改南京兵科嘗條陳商書一德三義軍政四事馬

政五事足國裕民六事上嘉納之命著爲令甲與同臺會糾王
太宰瓊以此見忌出知嘉興府首以約已愛民除奸剔蠹勸學
興賢爲務踰年郡中大治坐蜚語罷去之日士民塞河遮道號
聲動天共立祠祀復梓去思錄以紀之父老三詣闕上書當道
交薦二十餘疏皆不起家居杜門日與生徒講學不倦蕭然無
異布衣公性孝友冲淡寡慾剛毅敬慎器識宏遠故節義文章
政事卓然近古第不爲流俗所容厥施未竟士論深惜之祀鄉
賢

江滙字東之嘉靖丙戌進士授兵部主事歷陞湖廣按察副使
浙江按察使持法峻整有豪民王乾坐殺人行千金求免拒之
又屬柄相以請不聽竟論死轉河南右布政使以前事中齟齬
歸家無田產士論高其清素學道侯公峒曾稱其清以成仁斯
舉賢而理枉直能生勇復沮倖而鉗彊卒祀鄉賢著有遊楚稿
朱憲章字良範嘉靖壬辰進士授行人擢兵科給事中轉戶科
左時方有西海子之役及造龍舟費至鉅萬憲章疏凡兩上遂
停役會武定侯郭勛橫恣事覺合同官劾其交通賊黨諸大罪
下公卿驗問竟寘之法出爲四川按察副使歷福建叅政歸清
約無異寒士與羅洪先唐順之往還論學晚更好易推本爻繫
之旨多所發明著訂頑隨筆雪里子集

曾鈞字廷和嘉靖壬辰進士授行人擢南京禮科給事中時四

方銀場入不敷出且爲盜藪鈞奏罷之霍尚書韜方貴重在南
禮部鈞與抗對坐不避途韜亦屈服嘗上疏言士習流弊廉汚
之介弗嚴靜躁之分弗審而大臣尤甚古者大臣慮四方今則
守局循常矣古者大臣恭儉率物今則窮奢競美矣古者大臣
同寅協恭今則交惡相傾矣忠佞之辨願陛下加意上允納之
數彈事不避權勢首劾罷叅贊尚書劉龍已劾翊國公郭勛工
部侍郎蔣淦延綏巡撫趙錦最後劾叅江都御史柴經直聲大
震尤惡禮部尚書嚴嵩每上疏必首擊之會拜嵩揆遂抗章略
曰新任大學士仍當禮部事嵩行同狙獍性甚虺蛇外謹恪而
內卽恬淫陽恭順而陰肆驕橫姦邪百狀殆難縷數復加鄙惡
之子世蕃招權納賄以助其惡嵩一人之貪雖未足以竭天下
之財也臣恐貪者皆將憑附焉而天下之財竭矣一人之姦雖
未足以傾天下之事也臣恐姦者皆憑附焉而天下之事傾矣
惡源不塞末流愈濫輔臣政樞也嚴嵩奸邪之尤者也嵩不去
則必蠹聖政以煩聖慮報聞出爲雲南按察副使故事兩司詣
黔國公輒廷謁鈞始正其禮且釐還所侵佔麗江民地遷四川
叅政適蜀黔諸彝相煽同列憚往鈞慨然代之事遄以寧歷河
南左布政擢副都御史總理河道徐邳等十七州縣連被水患
帝憂之促上疏淪之法鈞請濬劉伶臺至赤晏廟八十里築草
灣老黃河口增高家堰長堤繕新莊堰等舊牘閱數月工成進

進賢縣志 卷之七
工部右侍郎治河四年改南京刑部右侍郎久之乞歸釣貌寢
不踰中人而端嚴勁介聽其論者爲之慄然卒贈刑部尚書諡
恭肅祀鄉賢所著有前溪集

萬宗義字克芳嘉靖辛卯鄉薦初署河南鄧州學正學例有額
貼悉捐給弟子周其貧乏勸課不輟當道以飭躬勵行崇雅黜
浮薦典山東文衡尋陞盧龍知縣邑例有富戶遠迎怒而遣之
春秋黜馬悉委之幕官却其陋規釐宿弊撫疲民百姓歌舞載
道以父耄托病歸養撫按留之不能奪行旅蕭然至家菽水承
歡不懈尋居父喪廬墓盡禮聚士子講聖賢性命之學不輟邑
令慕其風節題其居曰南州高士

雷夢麟字伯仁嘉靖甲辰進士授無爲知州治理有聲遷工部
員外郎復除刑部明法律善持平駙馬鄔景和失撰青詞且辭
賞忤旨坐劾夢麟論鄔不嫻文學罪在辭賞薄治足矣讞上報
可時儲位未建有曾御史佩復命誤用青表上怒甚疑有譏訕
下御史獄夢麟復佐尚書議當調外有旨切責已僅免御史官
嘗奏進所著讀律瑣言又條上罪囚永戍者只以戍後生子代
伍免行勾原籍議中格後竟行之遷天津兵備副使歷陝西左
叅政初麟家貧訓蒙無爲州衣敝縵袍爲州人挪揄已爲州守
而向挪揄者適以里役爲民壯簇輿行愧而敬之

熊汝達字德明嘉靖進士除刑部主事歷陞泉州知府歲己未

倭逼泉州悉力捍禦日行赤日中與士卒爲伍夜分被甲不釋相持月餘寇去泉人德之爲立生祠遷四川按察副使歷廣東左布政擢右副都御史巡撫廣東改浙江轉工部右侍郎清約無改素風萬厯初疏歸侍養時年近六旬孺慕夔夔封君色稍不和則長跼請不命之起不敢起析宦橐以遺二弟以前治山陵果於綜覈諸閹忌之坐奪官又數年召起刑部左侍郎尋遷右都御史掌南京都察院甫任復以事被劾歸所著有讀書劄記知警錄穀堂或問弋蟲集觀物稿

吳仲字應和父守愚以善行稱夢繡虎拜庭而生仲及長魁梧文采試諸生輒高等嘉靖丙午登賢書甲戌試銓部何公源爲同年友使自取善地仲曰有詔除在遂授湘潭比至飭新學寬積遺損已爲民當官不避坐此積怒上官意適以邑鎮失盜欲緣事去之丁丑坐計免御使大夫陳公烱曰君子也於潭有功改鄱縣長鄱巖邑而多霾仲不爲薄己卯政成報最以母喪歸居家愛敬伯兄每饗殮必與共族里有觴伯不與不樂卽夜盡必詣伯兄所好施予晚益貧約讀書環堵熙如也天啟丁卯崇祀鄉賢勸語云學有淵源家傳孝謹握符兩邑董桂之性常存勵節一生冰檠之心不改雖負郭窮巷門多長者之車而凌雨震風輒見先生之卧三徑荒矣孰云廉吏可爲四壁蕭然惟有遺經尚在允宜俎豆以表幽貞此實錄也

江滿字謙之號曰湖東關人天性剛直敢於任事好直言常面折人過不少諱避少年登進士第初爲巴陵尹蕭然如僧寺潔已愛民明敏善斷咸以神明稱之旁邑有疑獄久不決者輒訴之巴陵立爲分割郡守常微行至階下觀其聽斷洎歸常語于族曰我在巴陵飲一杯水耳陞刑部郎轉柳州知府時猺獞洞長負固盜名字爲剗平王縱恣不法滿密加偵探一日聞其病且劇乃僞爲醫者往治戒以靜攝屏左右坐幽室中遂手刃之置其首於藥笥以歸羣獠駭服以功擢叅政猶以專殺置閔往滿慙激不能容物一時風節足尚焉

江治字舜卿滿之從弟幼而奇穎年十三補弟子員父玠以逋賦被逮治匍匐以解父厄孫忠烈公召而試之大奇異之出其父授以館廩比忠烈公死宸濠難奔其喪縞練伏棺哭盡哀王文成召見器之語以學愈自奮嘉靖丁未成進士授刑部主事按潞藩觀炯獄乘法不少貸高中丞大節以備邊不如令獲譴有逢權貴意議置之死者治抗辭力爭奈何殺人媚人因得末減陞廣東按察僉事督學政得王宏誨袁昌祚馬象乾等多聞人攝鹽正篆守藏吏進羨金千八百兩引舊額爲言治奮起曰爲儒生時已甘窮約今肯以大吏盜公帑乎卽令解藩司充餉晉南京尚寶司卿遷太常少卿署應天府節冗却羨如東粵時歷陞南京工部右侍郎督織作清諸妄費中貴無從染指間肆

蜚語治不爲意奉旨督修鳳陽皇孝二陵刻期將竣事值邊警
悉索部帑存積十五萬解進其持已之介急公之義類如此歸
顏其亭曰洗心書齋頭有四以日以勤補拙以儉助廉以忍能
容以靜待動有四如曰始終如一窮達如一巨細如一隱顯如
一田居騎一蹇驢挾小蒼頭與村父相慰勞值歲饑糜粥自給
意泊如也再荷恩詔存問加封尚書年九十三臨終戒諸子毋
以葬祭累縣官謚恭恪

李輔字子卿爲御史風裁凝峻督兩畿學行部不攜胥役弊蠹
一清復刷卷京畿會張居正奪情言路多伺指保留輔獨不與
撫齊魯疏却羨金十萬賑齊饑晉南大司空淪城內河通壅滯
金陵至今賴之敷敷風憲游登臺座家無餘橐始終清白忌者
無從訾議焉卒贈太子少保

陳棟字隆之少穎異嘉靖乙丑舉進士第一以廷試第三授編
修隆慶間擢右贊善侍東宮適見書楮墨汚正色諫曰君父前
可苟簡若是耶東宮歛容以謝辛未校士拔同郡鄧以讚第一
後爲名臣世稱其鑒識壬申五月穆宗晏駕哭臨冒雨感疾卒
賜諭祭

附陳隆之嘉靖乙丑廷試策

制曰朕聞治天下者審所尚夏尚忠商尚質周尚文皆聖人
所以揀弊之政也周之末文日以勝當漢盛時論治者已謂

宜損周之文致用夏之忠況今去古益遠文之弊其可以弗
揀哉然人情之趨於僞也猶水之趨於下也今欲損文而用
忠其道何繇士大夫者民之表也朕於百司屢詔以實爲謂
庶幾有副朕意者徐而察之則修政者或徒美觀聽而未能
建保邦之業獻議者或徒工詞說而未能效濟時之猷稱愛
民者或飾甘言而乏一體之心名任事者或張虛聲而罕特
立之節致身之義非不知也而鮮克盡瘁於蹇蹇慎獨之訓
非不聞也而率多墮行於冥冥然則欲民之還於忠也不亦
難乎夫古之民不賞而勸不怒而威於鈇鉞乃今士大夫且
不能然其故何也爾諸士上下古今必有慨於茲矣其爲朕
根極弊源與所以揀之之術詳著於篇朕將擇而行焉

臣謹對臣聞帝王之以道經世也操損益之權于其上而後
有可久之治責真實之效於其下而後有共濟之功夫道原
於天固厯萬世以無弊然及其行之旣久也而不有以繼之
則易窮補其偏而救其弊司化者之責也聖人觀時勢之會
酌古今之宜於是乎有變通之政而道揆之宰於上者自日
運而不窮政出於君固合萬民以觀化然方其習之已成也
而欲有以變之則難從其行令而致之民承宣者之事也聖
人立臣民之極察向背之由於是乎有責實之政而法守之
遵於下者自共濟而不偏蓋上之化下也有機而下之從上

也貴實上之人不狃於習尚而預識其機下之人不事於虛文而務圖其實上下一心如一元之爲運而四時迭布以成功華實並茂如太素之爲體而五彩彰施以爲美帝王之所以移風俗而成久安長治之業者端不外於此也欽惟皇帝陛下資稟神聖位作君師歷五百歲之昌期而曰敬曰一有以接帝王道統之傳承億萬年之歷數而建中建極有以法祖宗心法之秘默通於天載教布於海隅嘉靖萬邦四十有四年於茲矣臣愚也賤幸際陛下久道之所成壽考之所作乃叨有司之薦恭承大廷之問首稽三代之所尚而獨慨文勝之易趨繼察損益之所由而深責臣工之無實臣仰知陛下欲追粹古之隆挽當今之弊甚盛心也臣固日用而不知者何以仰答清問之萬一乎顧聞之農夫勞力而君子養焉愚者圖策而智者擇焉若是則臣乃可以言進矣敢不披瀝忠悃以對伏惟聖制有曰治天下者審所尚夏尚忠商尚質周尚文皆聖人所以揀弊之政也周之末文日以勝當漢盛時已謂宜損周之文致用夏之忠況今去古益遠文之弊其可以弗揀哉然人情之趨於僞也猶水之趨於下也今欲損文而用忠其道何由陛下興言及此社稷之福也天下臣民之幸也夫世道有隆污習俗有升降而其機皆係於上之所尚聖人治天下必審所尚以一斯民之耳目以爲子孫之憑

下欲追粹古之隆挽當今之弊甚盛心也臣固日用而不知者何以仰答清問之萬一乎顧聞之農夫勞力而君子養焉愚者圖策而智者擇焉若是則臣乃可以言進矣敢不披瀝忠悃以對伏惟聖制有曰治天下者審所尚夏尚忠商尚質周尚文皆聖人所以揀弊之政也周之末文日以勝當漢盛時已謂宜損周之文致用夏之忠況今去古益遠文之弊其可以弗揀哉然人情之趨於僞也猶水之趨於下也今欲損文而用忠其道何由陛下興言及此社稷之福也天下臣民之幸也夫世道有隆污習俗有升降而其機皆係於上之所尚聖人治天下必審所尚以一斯民之耳目以爲子孫之憑

藉則夏之忠商之質周之文固宜傳之萬世無弊也其初竭心思立法制遠稽之古近參之今則夫忠之易至於野質之易至於俚文之易至於史聖人豈不知之而顧以貽後世紛更之爲也噫勢也聖人亦莫如之何也顧其所以轉移變通者存乎後之人何如耳夫忠之與質非有二也先儒謂忠則渾然誠慤無質可言是上世之政可以世守也周繼二代之後循之亦足以爲治而何必於文之也及觀孔子曰周監于二代郁郁乎文哉則周之所尚似若一於文矣臣則以爲孔子所贊之文卽先進之文文而得其中者也曰監於二代則夏商之忠質在周已兼之矣非若末世之一於文利而巧文而不慚者也文而至於勝焉孔子豈從之哉表記曰周人近人而忠焉則周之所尚非一於文可知也已判而爲春秋分而爲列國文之弊極矣當漢盛時高帝除弊政孝文躬節儉其庶幾忠質之餘風乎然而繁文漸盛古道日漓識治之士懼其流而不可挽也時有董仲舒者惓惓於三策之陳欲以損周之文致用夏之忠夫周之文乘百王救弊之會而損益之者也茲又損之者何蓋欲損其末世之所趨而進之文質之彬彬者也譬之暑謝寒代夏葛冬裘天時人事自有不得不然者仲舒之意其卽孔子從先進之意乎惜乎雄才大畧之主旣無以察其機宏羊卜式之臣又無以崇其實縉紳不

憚爲詐吏民相胥爲奸風俗凌夷而竟莫之反也唐宋而下
又甚矣洪惟我國家當鼎革之始際剝復之餘碩果不食眞
精再完若一開闢然此文復爲質之機也而我二祖又以質
樸先之如床碎鏤金服御澣濯隙地種蔬農家進食何其儉
約之若此也當其時天下化之文具省而實意多道德一而
風俗同所謂太和元氣之會未雕未斲之天也而三代不足
言矣列聖相承重熙累洽而我皇上又以渾厚培之訓誥頻
仍詔旨諄切冗費裁革玩好不畱忠也質也兼而用之者也
聖明之好尚豈非一時之規畫乎凡我臣工涵育於紀綱振
作之中薰陶於恭儉元默之治固宜黜浮囂之習而進之唐

虞之盛矣況一心所欲百體爭趨焉一人所命四海向風焉
未有上之人所好在此而反違其所令也自今觀之天下文
極矣庶民之家競以奢侈相尚而尊卑貴賤之無制冠昏喪
祭之踰度豈無賈誼之言於漢文者乎禮失而采樂失而淫
豈無如嚴安之言於漢武者乎好文而益媮飾詐而相高豈
無如蘇子之言於宋時者乎風俗至此駸駸乎不如國初之
舊矣昔堯有天下而晉陽之民被其餘澤習俗千有餘年而
蟋蟀所咏至今猶可想見其憂深思遠之風焉如此乎聖化
之遠也今聖人在上奚啻堯德而中外之民又其所親炙而
薰陶者乎乃其風俗大有異於蟋蟀焉豈聖人之化能被於

進賢集志 卷一
千萬世之後而不能加於一時之近耶臣嘗深求其故矣蓋唐虞之風所以爲萬世稱淳者非堯之自爲也忠信之長慈惠之師有以體其德意而奉行之也如舜之溫恭如禹之勤儉其他教稼穡明人倫治山澤典五禮司五刑所以經綸世道者又莫不有真實之心以行其間以實心建實業夫是以觀其化者有時雍之美薰其德者有可風之俗而渾渾噩噩至今爲烈也已夏商周所尚若循環然其初之所以政平俗美而詐僞不生士樸民淳而趨向有定亦非上之人自爲也有禹湯文武之君而又有禹湯文武之臣倡率之於先遵守之於後茲三代之民所以不易而化也然則今之習俗其故

可知也已士大夫者民之表也君陳克敬典則時罔不變嘉賓有德音則視民不怵詩書所載善俗之由譬之表正則影端固有必然者陛下屢勤詔旨而文勝之弊乃未能悉釐其舊亦有司奉行者之未實耶內之拱衛社稷外之旬宣邦國固必有實心以修實政者矣然或徒美觀聽而未能建保邦之業亦容有之乎近之臺諫建白遠之撫按糾劾固必有實心以獻議者矣然或徒工詞說而未能效濟時之猷亦容有之乎膺民社之寄者豈無循良之吏然或飾甘言而乏一體之心則愛民者未必有其實也當利害之衝者豈無果敢之才然或張虛聲而罕特立之節則任事者未必其實也背公

徇私之臣鮮克盡瘁於蹇蹇則致身之義亦徒知之而非實於忠君者也詐善掩惡之輩率多墮行於冥冥則慎獨之訓亦徒聞之而非實於行已者也凡我臣工其所以爲民者誠有愧於唐虞三代之臣矣表之不立民何以觀而欲其同於唐虞三代之俗也不亦難乎此所以厯陛下之慮也夫人之趨於僞也如水之趨下然不重有以堤防之不可也臣請陳六事以備採擇一曰抑僥倖張釋之謂嗇夫以口辨而超遷恐天下從風而靡所以貴實也今之以口舌得官者徒文具無實國將何賴焉其必重惜名器而主司之獎拔求無倖進銓曹之陞擢求無倖位監司之保舉求無倖薦則射名干祿之士庶可以少息耳二曰崇素儉昔子產治鄭大夫之忠儉者從而與之奢侈者因而斃之所以示樸也今之以富貴誇尚者徒耗費無節後將何繼焉其必定爲約制而冠服有式踰式者罰宴享有時不時者黜餽送有禮無禮者免則僞采淫泰之風庶可以少衰耳三曰審國是夫言官之論列勸懲係焉誠得其實而上陳之豈非耳目之所賴哉而毀譽之私則不可徇也某人可劾必稽諸輿論之所共棄者何如某事可錄必考諸平日之所制行者何如此而不實非所以旌別淑慝也其必灼知直枉嚴覈章疏而譽阿毀墨之罔庶乎其知所警矣四曰重邦本夫農民之樸茂直道存焉誠得盡民

而農之豈非衢壤之休風哉而勸課之政貴實舉行也憫農之苦宜勤撫字而均徭役念農之貧宜禁游食而恤流移此之不實非所以崇本抑末也其必春秋有補助水早有蠲賑而游惰末作之民庶乎其漸歸農矣五曰敦士習夫實修之士卽異時善俗之臣魏晉六朝土工風雲月露識者憂之以其無實也必也直省學臣後文藝而先器識庠序師儒課經義而兼治事則佻達浮夸之士咸知歛華務實矣六曰絕異端夫典謨所載實萬世治平之準秦皇漢武惑於神僊方伎論者惜之以其虛驚也必也孔孟之學加意表彰老佛之流槩從放斥則文成五利之徒不敢罔上誣民矣凡皆愚臣一

得之獻或亦挽文還忠之亟務歟臣又伏惟聖制有曰夫古之民不賞而勸不怒而威於鈇鉞今士大夫且不能然其故何也臣讀斯言抑豈惟陛下疑之乎臣且惑之矣夫有所爲而爲善則爲善必不誠有所激而爲忠則其忠必不盡且觀勢達變機存乎上者也奉公守正責存乎下者也欲盡其責而猶待於賞威之施非忠臣也今欲追夏商之忠質而定萬世不易之守亦在乎臣工之自致其實而已矣雖然所以勸臣者有本焉昔者董子之告君也有曰正心以正朝廷正朝廷以正百官正百官以正萬民臣是知羣臣者民之表也臣心之誠僞固民俗之所由以淳漓大君者臣之主也君心之

通賢集卷之七
邪正又臣工之所視以爲則效者也其機捷於桴鼓神於風
草不可不審也仰惟陛下敬一有箴四箴有註則至誠無息
之道固已養之於裕而守之於恒矣正心之論似無待於芹
曝之陳也然陛下始以董子之言爲問臣以董子之言爲陛
下進夫中心爲忠無隱顯無彼此而純然者也臣事君以忠
推而至於一念之微一事之著無一毫不可知於君則官箴
肅而斯民之表率端焉陛下處已忠推而至於宮闈之深邃
廟廷之對越無一毫不可知於天則皇極建而百辟之儀刑
具焉將見由朝廷以及百官由百官以及萬民相率而爲忠
厚彼挾詐懷私侈靡相競者莫不曰聖天子之所好尚若何
賢公卿之所遵守若何而敢自處於儉薄爲也風俗純美不
令而行不禁而止吏無奸邪民無僭越德被草木化洽生民
雖與唐虞並隆可也而何三代之足云哉臣狂瞽之言芻蕘
之見不識忌諱無任戰慄隕越之至臣謹對

羅希賢字復卿號泉麓隆慶丁卯舉于鄉任廣東廉州府推官
陞貴州貴陽府同知冲然長者爲李官風裁獨著不少徇賢聲
懋著撫按交章薦題署鎮遠府尋以母喪歸生平事繼母最孝
數十年如一日撫弟姪有張公藝風壯年失偶不再娶房無侍
媵四十載獨居一室帷榻淒然四舉鄉飲大賓不就邑爭誦有
古人風

饒崙字北宗萬厯癸未進士厯推官御史博學竒文學者推重與臨川湯顯祖西昌張壽朋一時齊名惜天不假年未竟大用吳文英字鬱材萬厯乙未進士器宇軒翔胸懷磊落好讀書善辭賦談古今是非得失輒數千言初授浙江平湖知縣調福建羅源縣尋擢南京大理評事厯部主事郎中陞貴州監軍副使歸時囊橐蕭然餽粥不給

涂杰字汝高九都人新建籍隆慶庚午辛未連第授龍游知縣治績甚著行取廣西道御史巡按湖廣平反全活多人陞光祿少卿萬厯癸巳值有三王並封之旨杰上疏語殊激切遂削職歸卒贈大理寺正卿祀龍游名宦

樊兆程字一鵬以萬厯鄉薦署柏鄉教諭陞贛榆知縣邑故無城海寇出沒兆程蠲俸率民卜築不足則議起坐地稅以衛民故權宜而民不稱厲甫浹歲雉堞巍然保障永賴秩滿擢工部主事厯屯田都水司郎中奉勅督濬海口先是河決屢遷清濟虞漕汴虞宗室鳳滁虞陵寢蓋國家大利害也兆程修閘築堰躬親其勞同士卒甘苦所費水衡錢不奢多劉晏造舟之意上嘉之陞山東布政司叅議厯宦所至輒建竒勛邑令黃汝亨所建橋堤社倉之類悉與商畫後督學江右特俎豆之

朱鼎臣字公鼐自幼才志橫鶩博通經術不可一世爲諸生二十餘載始舉於鄉就玉山縣教諭日課諸生學政清肅當路高

之累薦擢淮陰司理淮奸宄實繁有徒鼎臣至卽緝渠魁置之
法適山東歲饑流移接踵條議設廠賑粥全活無數有質流民
子女爲利者郡守以梓里故禁特厲株及疑似直指駁之下淮
理鼎臣竟直之又府屬例循次掣儲鹽牒下弗往或有私爲慮
者曰緝盜任怨施粥任功反案牘難爲長謝鹽務難爲前鼎臣
曰吾率吾素盡吾職而已無何果被謗解組歸所餘俸橐盡出
以供祖塋及族衆廬井之費大都生平骯髒不屑屑繩尺矜然
諾重氣誼敢任大事然少款洽所至落落難合易簣時猶以夙
抱未抒勉勵其後無一語及家事云

李光元字麟初嗜學好古神宗己亥詔選天下才士實太學光
元以貢通籍應庚子順天試時制藝方裁長允光元宏博數千
言主司擊節嘆賞丁未成進士選庶吉士課高等授編修冊封
蜀藩取道歸省以病告侍養七年庚申再出厯起居注纂修兩
朝實錄經筵日講知制誥往時講官以天威咫尺間倉皇失措
光元貌軒爽闡論明晰聲中金石周旋中規矩上嘉悅一月而
遷者三壬戌分校會試尋再歸養丙寅起爲少宗伯行至宿州
卒光元生平敦德行尚志節爲諸生時卽以天下自任與人嚴
簡不謬恭謹然沖虛淡泊未自矜也性孝友贈公義方之督旣
抱子輒撻之流血而敬不違贈公歿事太宜人依依如孺子居
家非大禮不見有司利病輒昌言之晚益純粹自號二鹿山人

著有市南子集子峻以文行知名書法絕工

方義壯字伯猷七都人年二十舉於鄉五上春官不第甲戌會試副榜第一授桐鄉教職旋改補江西太和教諭造士有方厯雲和東鄉容城縣令所至俱用寬和爲理民懷其惠在蜀之東鄉時治梁山冤獄平反十餘人致仕家居十載兩舉鄉飲大賓爲人質直厚重不設城府好讀書手一編至老不釋清約若寒士卒祀東鄉名宦

方以知字惟義七都人登萬厯丁酉鄉試厯連江衡陽縣令所治民皆愛慕之尋將考績卒於官歸櫬行李蕭然衡之士民哭奠咸致其哀爲人醇雅好修處家庭孝友與物謙和世稱豈弟父母篤行君子也

徐應鶴字夢得壬辰進士少有神童之目長益淹洽多通時邑令以早籲神求爲文者應鶴援筆立成引據典奧令大竒之邑之崇史學自鶴始太史李公光元出稍後而以博覽齊名宗伯吳士元其高弟也筮仕授烏程令先是強宗構難舊令首罹其辜兩臺亦譴去鶴至不隨不激剴決如神賢聲大起丁酉上計舉卓異擬銓擢會爲忌者所抑遂以工部主政請告

顏佐號一齋戊子舉人任福建仙遊知縣性樸厚爲政有惠聲介潔不苟取居官一年卒於任士民送其柩歸皆爲淚下曾以百金買學田及助修大石橋孳孳好義惟恐弗及云

